

直隸趙州志卷六

官師志

名宦

牧民之術州守與邑令異州守承臺司教旨作令長表率政教於是乎出賦稅於是乎綜盜賊於是乎追捕獄訟於是乎讞決國法凜凜毫無假貸况趙郡地當孔道事務殷繁供應匪易撫字尤難土壤則沙礫相半佃種則工費不貲一遇歉歲卽難自給仰哺俯畜之餘竭蹶甚矣剖符來者軫閭左勤劬撫摩而喫咻之好惡與同教養備至將使比屋騰譽汗簡流芬

趙州志

卷六

名宦

一

常山還鹿之謠烏得專美哉乃漢晉以前不可考北魏得二人北齊得一人唐及五代得五人宋元得六人史策抑何寥寥耶意者歲月綿邈書缺有閒乎有明迄康熙癸丑勤民効職者多舊志之力當

國家鼎盛講求吏治之日賢牧良佐自必駢肩接迹無如乘志委棄纂述失時遂使循良治績隨荒煙蔓草以俱湮可慨也夫茲僅就士庶口傳續登數人生存者不錄避阿好也

北魏

李曾

崔孝偉

北齊

鄭述祖

唐

弓志元

高叡

康日知

五代

烏震

符令謙

宋

魯伯能

元

趙振玉

耶律天祐

王玉

溫迪罕完

趙州志

卷六

名宦

二

齊謙

明

章綸

何濬

潘洪

馬中良

趙開心

王之統

國朝

陶鼎鉉

韓廷柱

商永傑

祝萬祉

李夢白

龔嶸

李坦

胡枝蕙

許鉉

姚麟紱

段廣瀛

劉錫穀

張保泰

孟傳鑄

劉牲

北魏

李曾平棘人少治鄭氏禮左氏春秋以教授為業郡三辟功曹不就門人勸之曾曰功曹之職雖曰鄉選高第猶是郡吏耳北面事人亦何容易州辟主簿到官月餘遂還家講授太祖時徵拜博士出為趙郡太守令行禁上劫盜奔竄太宗嘉之并州丁零數為山東之害知曾能得百姓死力憚不入境賊於常山界得一死鹿謂趙郡地也賊長責之還令送鹿故處隣郡為之謠曰詐作趙郡鹿猶勝常山粟其見憚如此卒贈平南將軍荊州刺史柏仁子謚曰懿魏書

趙州志

卷六

名宦

三

崔孝偉安平人光州刺史挺之子也任趙州太守郡經葛榮離亂後人皆賣鬻兒女夏椹大熟孝偉勸戶人多收之郡人乃安教其人種植招撫遺散先恩後威一周之後流戶大至興立學校親加勸厲百姓賴之卒郡贈瀛州刺史謚曰簡復贈安北將軍定州刺史北史

北齊

鄭述祖字恭文滎陽開封人歷太子少保左光祿大夫儀同三司兗州刺史境內無盜百姓歌曰大鄭公其父道昭曾任兗州刺史小鄭公相去五十載風教猶相同及病篤言曰吾以清白之名遺子孫死無所恨前後行瀛殷冀滄趙定

六州事除懷亮光三州刺史又重行殷懷趙三州刺史  
所在皆有惠政卒贈開府中書監北豫州刺史謚曰平  
簡公北史

唐

弓志元永徽五年爲平棘令大興水利邑東二里有廣潤  
陂引太白渠注之又開東南二十里之畢泓以時蓄洩  
民食其利唐書地理志

高叡京兆萬年人隋尙書左僕射頰孫也舉明經稍遷通  
義令有治勞人刻石載德歷趙州刺史昌平縣子聖歷  
初突厥默啜入寇叡嬰城拒虜攻益急長史唐波若度

趙州志

卷六

名宦

四

且陷卽與虜通叡覺之力不能制卽自縊不得死爲虜  
執使諭降諸縣不肯應見殺初虜至有爲叡計者曰突  
厥鋒銳所向無完城公不能亢且當下之答曰我刺史  
不戰而降罪大矣武后聞之歎惜贈冬宮尙書謚曰節  
詔誅波若籍其家下制暴叡忠節使天下知之唐書

康曰知靈州人少事李惟岳累擢趙州刺史惟岳叛曰知  
與別駕李濯及步將百人啐牲血共盟固州自歸惟岳  
怒遣先鋒王武俊攻之曰知使客謝武俊曰賊辱甚安  
足共安危哉吾城固土和雖引歲未可下且賊所恃者  
田悅耳悅兵血饑邢壕不能殘半堞况吾城之完乎又

給爲臺檢示曰使者齎詔諭中丞中丞奈何負天子從小兒跳梁哉武俊悟引兵還斬惟岳以獻德宗美其謀擢爲深趙觀察使會王武俊勒兵拒命遣將張鍾葵攻趙州日知破之上俘京師尋以深趙益成德徙日知奉誠軍節度使

唐書

### 五代

烏震冀州信都人也少事趙王王鎔爲軍卒稍以功遷裨校隸符習軍習從莊宗於河上而鎔爲張文禮所弑震從習討文禮家在趙文禮執震母妻及子十餘人以招震震不顧乃皆斷其手鼻割而不誅縱至習軍軍中皆

### 趙州志

### 卷六

名宦

五

不忍正視震一慟而止憤激自勵身先士卒攻破鎮州以功拜深趙二州刺史爲人純質少好學通左氏春秋喜作詩善書及爲刺史以廉平爲政有聲遷冀州刺史明宗使代房知溫戍於蘆臺軍始至而戍兵亂見殺贈太師

五代史

符令謙昭慶人宣武軍節度習子有勇力善騎射以父任爲將官至趙州刺史有善政卒於州州人號泣送葬者千人當時號爲良刺史

五代史

### 宋

魯伯能吳興人大觀初通判慶源府軍事領雲騎尉天資

明敏博學工文詞尤長吏治生平無所嗜好惟以翰墨自娛著有文集三百餘卷在趙有望漢臺銘及慶源軍使廳續題名記

志

元

趙振玉先世居邢臺遷利州之龍山金貞祐元年元帥南下史天倪迎降授萬戶開幕府明年龍山降振玉隸天倪部下雅爲所知金正大二年春金恆山公武仙降已久與天倪有隙忽翻城天倪死之振玉季弟進玉沒於難振玉及從兄真定府判官真玉跳免旋隨天倪之弟天澤裒集散卒攻真定克之招降臨城杏樹等砦遂下

趙州志

卷六

名宦

六

邢趙兩州州民在保聚者不下千百家悉復故並復趙州慶源軍本號太師木華黎遂命振玉爲節度使兼本州管內觀察使後四年改河西北路按察使兼帥府已而復授慶源在趙七年幕府上前後功擢真定路工匠都總管始蒞慶源之日戶不滿百披荆棘拾瓦礫招散亡立廬舍勸課農桑流通貿易時西山羣盜四出剽掠振玉深入誅捕境內晏然其入爲參佐也豪猾無所顧忌有白晝殺人於市者及受命再至郡民鼓舞迎勞謳歌載路甫下車按殺人者之罪敕怨家婦手刃之闔郡稱快兵燹之後文廟學舍咸傾毀振玉力任繕葺出貲

於家僱庸於民躬自督視工鉅費繁閱數年乃克有成  
堂廡齋厨像設禮器秩然煥然諸生釋菜如儀文教遂  
興故當時述良吏者稱爲巨擘初振玉父母歿時值兵  
亂不及葬權厝於佛寺後寺屋燬失藁殯所在治趙久  
有德於趙人爰做朱邑桐鄉之意葬父母衣冠於州西  
蘇村南原進玉亦耐兆域之內後世遂葬焉子昌祖襲  
眞定路工匠都總管別有傳

節錄元好問墓碑

耶律天祐契丹人父忒末祖丑哥仕遼爲都統不屈節死  
金主憫其忠義授忒末都統歲甲戌國兵至忒末及子  
天祐內附授帥府監軍天祐招討使從元帥史天倪畧

趙州志

卷六

名宦

七

趙州平棘欒城元氏柏鄉贊皇臨城等縣籍其民五千  
餘置吏安輯焉辛巳忒末與天祐畧邢洛磁相懷孟有  
功忒末遷河北西路安撫使壬午致仕退居眞定天祐  
襲職從天倪攻取益都諸城畧滄棣乙酉金降將武仙  
據眞定以叛殺天倪忒末父子夜踰城而出會天倪弟  
天澤合諸軍南與賊戰走武仙復眞定朝廷以天祐鎮  
趙州明年仙復犯眞定天澤潛師出藁城忒末與其妻  
石抹氏及家孥在眞定者皆陷焉仙遣其僕劉攬兒持  
書誘天祐曰汝能誅趙州官吏以降當活汝父母不爾  
盡烹之忒末密令攬兒語天祐曰仙賊狡猾汝所知也

毋以我故墮其機竅以虧忠節且忠孝難兩全汝能固守不失國家大計我視刀鋸甘如飴矣天祐慟哭承命馳至藁城以賊書示天澤天澤曰王陵之事照耀史冊汝能遵父命忠誠許國功不在王陵下天祐乃趨還趙壁率眾殊死戰仙怒盡殺武末家一十八人戰於樂城元氏高邑柏鄉仙兵屢挫監軍張林密構仙黨啟關納賊天祐倉皇巷戰手刃數十人身被十餘創斬關出復收散卒圍城丁亥賊棄城走追至藁城會天澤兵夾擊殺張林加奉國上將軍洺州征行元帥兼趙州安撫使以傷憊致仕居趙卒孫世楷朝列大夫江西權茶都轉

趙州志

卷六

名宦

八

運使

元史

王玉趙州甯晉人長身駢肩多力金季爲萬戶鎮趙州太師木華黎下中原玉率眾來附從攻邢洛磁三州濟南諸郡又破平陽下太原汾代等州師還署元帥府監軍以趙州四十寨隸焉先是金將武仙旣降復叛宋將彭義斌在大名陰與仙合玉從史天澤攻敗武仙生擒義斌仙遣人賁誥命誘玉妻妻拒之曰妾豈可使夫懷二心於國家耶仙圍之數匝殺其子甯壽玉聞之領數騎突其圍斬獲數百人而還玉從史天澤諸將擊仙於趙州仙糧絕走雙門寨圍之會大風仙獨脫走斬其將四



十三人加定遠將軍權真定五路萬戶假趙州慶源軍節度副使有民負西域賈銀倍其母不能償玉出銀五千兩代償之又出家奴二百餘口爲良民

元史

溫迪罕完蓋州人至元元年知本州州當子午要途所費不貲完從容辦集民不爲擾又平市價蠲租賦均節石口以備凶荒民賴其利

舊志

齊謙幽都人至元間知本州每旦署事日昃方退時經歲艱食者衆謙爲申請於朝發公帑以賑之臨城縣地險而瘠民不能支有棄業亡去者所遺差額累見戶代輸謙知其寃卽與分豁平棘李成陳英爭田三十年不決

趙州志

卷六

名宦

九

謙片言釋之皆叩首聽命又解綬日士民持送食幣謙艴然曰吾之素志始終豈有二哉竟辭而去

舊志

明

章綸桐城人由給事中出刺本州廉介有爲善譽著聞薦知晉州值歲饑饉而賑濟有方民賴全活者甚衆後陞

武昌知府

舊志

何濬河南靈寶人天順間由象州改知本州敷仁布惠不尙鞭笞值歲飢賑濟有法民無流移權要有侵民地者濬力疏於朝以身殉之未嘗計禍福卒復民業勸民起集西關以通商旅鑿井泉以資灌溉重新學校以正士

習歷在六年民感戴如父母後陞南康知府歸老於家  
州人歲遣子弟問慰不絕及卒州之男女聞而巷哭者  
三日咸立木主祀之大理卿王鑑之傳其事謂趙人疾  
痛必呼水旱必禱蓋親見其事云今有仰德祠春秋特  
祀

舊志

潘洪廣東南海人成化四年由東平知州移守本州先是  
州民多棄稼穡流離轉徙庠序之間門廡頽敗弗治洪  
至歎曰稼穡民命也學校化源也二者弗脩爲政者有  
餘責矣乃籍境內民數分授犁牛子種俾及時耕耘間  
赴郊野課勤惰粒食漸充遠遊者率歸里復業聽訟之

趙州志

卷六

名宦

十

暇召諸生會食與講詩書精義而徐察其行誼以勸董  
之賓禮其賢且才者人始知讀書之貴歲旣屢豐迺修  
葺學宮門壁廊廡並出餘力繕城浚隍一時趨功者踴  
躍恐後修撰吳希賢爲之記

舊志

馬中良字瑞河四川建昌人萬曆九年任趙州訓導啟廸  
青衿如課子弟執贄者悉卻之時出薄俸振乏困歲凶  
則輸穀濟饑一時士心悅服直指使者察其才俾攝隆  
平令至則順人情相地利陳六事於直指皆嘉納榜示  
諸郡復攝贊皇令贊疲地也中良慨然曰民之凋敝胥  
吏爲奸耳於是嚴懲凶徒窩訪者答積書飛詭者答清

逃征田一千二十餘畝而疲困蘇四境同聲頌神君在  
趙五年擢交河知縣去之日諸生依依不忍捨乃肖像  
於石且植碑紀去思云

節錄去思碑

趙開心湖廣長沙人崇禎十二年來守本州承兵燹後繼  
以奇荒撫恤殘黎如救焚拯溺兵事日急餉需遞增甯  
甘下考不忍敲朴旋爲宵小所傾去官入

國朝官至左都御史

舊志

王一統字萃州成安歲貢性孝友妻亡不再娶修文廟新  
城門立義學皆首倡舉授趙州司訓值崇禎十五年亂  
守東門率諸生晝夜防守城破猶奮勇死拒力竭被執

趙州志

卷六

名宦

十一

顏色不變誘至明倫堂曰吾得死所矣遂罵而死

廣平府志

國朝

陶鼎鉉遼東人廉幹勤明勇於任事下車日見文廟荒圯  
卽以修復自承俟之二年四境生業漸復乃興役殿宇  
門壁增拓舊規崇宏恢廓遂爲諸郡之冠履畝清丈欺  
隱畢露賦役迺均力行保甲盜賊皆避去閭閻慶安堵  
焉陞鎮江府同知厥後士民公請崇祀名宦祠

舊志

韓廷柱遼東人涖政寬和不事鞭朴苛察而民犯吏欺者

寡

舊志

商永傑洛陽人才猷豐瞻奮迅有爲尤注意文教修築明

倫堂敬一亭及兩齋舍而尊經閣更壯偉所費以鉅萬計一丁一緡未嘗索諸閭左巨觀煌煌數百年雄峙如故誰識經度之始實出使君私篋哉後之守者觀於此可以慨然慕瞿然興矣他善政無考陞鄖陽府知府舊志祝萬祉洛陽人嘗葺治常平倉工料堅實百年不敗又率紳士續修志書舊志

李夢白陝西人莅任六載士民戴德建二碑以誌功績舊志龔嶸福建閩縣人康熙二十八年任治政勤肅役不擾民捐俸脩學增置義學田歲荒賑濟有方時率里老訓化不倦實政載去思碑舊志

趙州志

卷六

名宦

三

李坦湖廣蘄州人康熙三十一年任正己率屬實心愛民凡水旱親率祈禱捷應如響施賑救荒捐貲無算種種惠政兆民永賴民之戴德正未有艾舊志

胡枝蕙安徽六安州人勤於聽斷案無留牘大小之獄必以情未嘗輕施箠楚而禁賭弭盜執法特嚴犯者痛繩之故盜賊畏威不入境附州治數十里無敢聚博徒以陷人者五年任滿擢山西知府去之日父老祖道皆雪涕至西郭有婦女百人跪送枝蕙曰汝輩奚爲者婦女同聲對曰我家男子素嗜賭公在故不敢逞公今往矣若輩無所畏忌將流落何所耶言畢涕泗交頤枝蕙不

忍視飲泣而去

許鉉字元孟本閩人遷無錫進士庶吉士以戶部主事改任州事州驛馬蕃庶歲需草數十萬斤購自閩左司入者握秤任手高下民苦之鉉首除其弊同聲稱便豫州寇亂師旅過境值歲旱穀價騰躍鉉出倉粟平糶列肆安堵春秋兩稅向假手市價代輸納者苦剝削而正供亦淹滯不及格官民交病鉉自投檟受之踴躍倍常時訓迪諸生肫切若塾師而慈祥寬和不輕笞責時有真民父母之謠在州五年以病乞歸父老叩臺門請留鉉卒不許著有詩文集若干卷

趙州志

卷六

名宦

三

附宦績

姚麟紱桐城人嘉慶乙丑翰林道光元年十月任聽斷明敏猾胥畏威鑑拔士類有特識至今猶傳頌之

段廣瀛字晏洲江蘇蕭縣人咸豐癸丑翰林同治癸亥任州事時務諳練決獄如神兩造來訟者咸畏服案牘餘閒禮賢課士訓迪不倦士類翕服時書院久廢肄業者無常處爰卽明倫堂前修業齋故基築室三楹聘師儒主講席文優者厚其獎資於是郡人咸知嚮學士習民風日有起色科第漸盛皆由其陶鎔之力後陞河南儲糧道歷任湖北按察使所著有紫滄文集行世

劉錫穀山東安邨人道光甲午舉人同治五年任州事六年正月間捻匪北竄湘軍輜重駐蘇村及大石橋供億浩繁公悉捐己貲不派累鄉民更與將弁嚴定條約俾士卒帖然受範閭閻恃以無擾暇則與諸生論文講藝於明倫堂東建講堂齋舍十餘間屆期命題躬自督課激勸有方士風大振至今稱道不置

張保泰和州人同治辛未任州事廉能勤敏吏畏民懷實心爲政不務虛聲性尙儉約使令僕從寥寥數人而究心民瘼案無積牘市無冤民吏胥擾民者必重懲之受代去郡人如矢慈母有自省會來者必問張公今蒞何

趙州志

卷六

名宦

十四

所其令人思慕如此

孟傳鑄字劍農號柳橋山左章邨人道光丁酉拔貢咸豐己未來判州事博聞強記爲文古茂兼工吟詠性樸直喜培植人材凡歷任郡侯興學校延師儒加考課優獎資皆由公懇懇之力同治初年捻匪馬匪猖獗前後入趙境大肆殺掠或漸逼近城垣人心惶怖計無所出公獨會僚友號召鄉紳議防守事宜立規則數條夜率眾執兵登陴以備賊賊不得入而一城之民賴以安同治十年郡侯存奉上憲檄重修趙州志請公秉筆公單身坐書城校讎編輯旦晚無暇晷大抵別具鑪錘不蹈前

人窠白若沿革若疆域若人物志皆提綱挈要眉目燦然所著諸序傳簡潔詳明古藻紛披洵得史家精液爲作志圭臬著有西行紀程西征集已梓別有詩文集藏於家

劉銜字鹿賓順天固安人道光癸卯舉人咸豐初任趙州學正學深養邃道氣迎人工制藝名重當時遠近執贄者甚眾隨詣力淺深而裁成之論文雖模範諸名家體裁務協時趨趙郡科第不競垂數十年自先生秉鐸俊造譽髦悉成良材躋仕擢科綿綿不絕士風爲之一振同治四年卒於官門人醵金歸葬至今思慕不置

趙州志

卷六

名宦

十五

職官

名宦而外再紀職官示貶乎非也顏之推賈緯王利  
用之文學皮景和暴顯魚俱羅楊義臣之武功周昉  
之繪事劉義叟之算術類能馳譽曩代流芬汗青又  
况梁彥光韋景駿隋唐循吏善政纍纍列諸職官不  
幾與碌碌充位者同類取譏乎夫志為趙作也有功  
德於趙乃登之顏賈皮暴諸人平生表著非一端而  
治趙政績未詳於冊守位日淺乎載筆者疏闕乎吾  
不得而知矣然除授見於史傳遺之不可也爰節錄  
數語用備掌故云

趙州志

卷六

職官

六

北魏

江紹興

崔敞

鄭雛

北齊

顏之推

皮景和

暴顯

隋

元褒

魚俱羅

梁彥光

楊義臣

唐

豆盧欽望

韋景駿

周昉

五代

沈斌

賈緯



宋

李韜

劉羲叟

金

張浩

納蘭胡魯利

元

王義

王利用

明

羅章

趙州志

卷六

職官

十七

北魏

江紹興陳留人徙代為秘書郎掌國史二十餘年以謹厚稱卒於趙郡太守北史

崔敞清河人襲武陵公爵降為侯出為平原相性狷急與

刺史楊椿迭相表列免官孝昌中為趙郡太守魏書

鄭雛滎陽開封人有識尚操行清整仕至膠州刺史初齊

文宣為皇太子納其女為良娣雛時為尚書郎趙郡李

祖昇兄弟微相敬憚楊愔奏授雛趙郡太守祖昇兄弟

具服至雛門投刺拜謁文宣聞之喜笑曰足得殺李家

兒矣北史

趙州志 卷六

職官

六

北齊

顏之推琅琊臨沂人早傳家業習禮傳博覽羣書詞情典

麗官湘東王繹左常侍擢散騎侍郎後為周軍所破薦

往宏農掌平陽王李慶遠書幹旋來奔顯祖見而悅之

侍從左右頗被顧盼河清末被舉為趙州功曹參軍齊

亡入周隋開皇中太子召為學士有文三十卷撰家訓

二十篇北齊書

皮景和下邳人少通敏善騎射天保初從征契丹定稽胡

又從討茹茹每有戰功封永甯郡開國公除尚書右僕

射趙州刺史北齊書

暴顯魏郡斥邱人少經軍旅善於騎射從高祖於信都舉  
義後封屯留縣開國侯從世宗平王思政授潁州刺史  
進爲公皇建元年封樂安郡開國公除趙州刺史

北齊書

隋

元褒字孝整便弓馬少有成人之量仕周官至開府北平

縣公趙州刺史後爲齊州太守

隋書

魚俱羅下邳人膂力絕人從晉王平陳以功拜開府隨楊

素擊突厥進位柱國拜豐城總管煬帝嗣位遷趙郡太

守

北史

梁彥光烏氏人爲歧州刺史有惠政嘉禾連理出於州境

趙州志

卷六

職官

九

上悅其能賜粟賜錢數歲轉相州刺史部人多變詐作

歌稱其不能理化竟坐免歲餘拜趙州刺史彥光自請

復爲相州上從之豪猾者聞其來莫不嗤笑彥光發姦

摘隱有若神明招致山東大儒每鄉立學於是皆尅勵

風俗大改

隋書

楊義臣代人性謹厚能馳射屢破突厥以功進位上大將

軍檢校趙郡太守擊破高士達斬張金稱帝惡其威名

追入朝

隋書

唐

豆盧欽望雍州萬年人累官越州都督李昭德被罪有司

劾奏欽望附臣罔君貶趙州刺史中宗復位擢尙書左僕射平章軍國重事居宰相十餘年獨謹身諂諂自全而已

唐書

韋景駿中明經爲肥鄉令苦漳水泛溢審度地勢因高障水沮洳盡爲良田時河北饑通其贍恤貧弱咸免流亡開元中移貴鄉令有母子相訟景駿告以少孤見人養親輒自恨終天汝幸有母在何至是錫類不行令之罪也因垂泣嗚咽乃取孝經付令習讀於是母子感悟遂稱慈孝累轉趙州長史後遷房州刺史立貢舉作興諸生通隘道作傳舍罷祠祀無名者治民惟取其便終奉

趙州志

卷六

職官

三

天令

宏簡錄

周昉字景立京兆人好學善屬文畫窮丹青之妙德宗時任趙州長史冀州程修己師事之

畫斷

五代

沈斌下邳人少爲軍卒事梁後事唐從魏王繼岌破蜀平康延孝以功爲趙州刺史又爲祁州刺史契丹攻陷祁州斌自盡

五代史

賈緯鎮州獲鹿人少舉進士不中州辟參軍唐天成中范彥光鎮成德辟趙州軍事判官遷石邑令長於史學唐自武宗後無實錄緯采次傳聞爲唐年補錄六十五卷

宋

李韜河朔人有勇力膽氣善用稍太祖征二叛韜從白文

珂攻河中大破之由是知名出為趙州刺史移慈州宋史

劉義叟字仲更澤州晉城人歐陽修薦其學術試大理評

事權趙州軍事判官精算術兼通大衍諸曆及修唐史

令專修律歷天行志著十三代史志劉氏輯歷春秋災

異諸書宋史

金

張浩字浩然遼陽渤海人天會八年進士授秘書郎超遷

趙州志 卷六

職官

三

衛尉卿求養親去職起為趙州刺史後拜左丞相封潞

王改蜀王金史

納蘭胡魯利大名路怕魯歡猛安人承安二年進士第一

從伐宋以勞加朝請大夫改禮部員外郎曹州刺史改

沃州後權河東南路宣撫副使金史

王義字宜之真定甯晉人河朔盜起縣人推義為長攝行

縣事木華黎兵至義以甯晉歸焉授甯晉令兼趙州以

南招撫使金將李伯祥據趙州木華黎遣義擣其城會

天大風雨義帥壯士挾長梯疾趨夜四鼓四面齊登殺

守陴者城中亂伯祥挺身走天壇寨一州遂定木華黎

承制授義趙州太守趙冀二州招撫使以功陞深州節度使深冀趙三州招撫使武仙復遣其將盧秀李伯祥率兵謀襲趙州並取瀝城義邀擊之擒秀伯祥退保瀝城義引兵拔之伯祥西走

元史

王利用字國賓通州潞縣人幼穎悟弱冠與魏初同學遂齊名初事世祖於潛邸中統初爲趙州知州入爲太子

賓客

元史

明

羅章廣西桂林人由舉人任靈壽知縣革弊除奸不畏強

禦陞趙州知州

靈壽縣志

趙州志

卷六

職官

三